

SANDE 2 BILONG ATVEN

I. RIT

Bar 5:1-9

Akar dapanim: Jerusalem, Godin nin adisir aghuim isi nguazimin gumamaziziba bar men akagham.

Akar kam, Godin akam inigha izir gumazim Baruk, an osiri.

O Jerusalem, ni azia ikiava aghuizir korotiaba suegh. Egh Godin gavgavim ko angazangarir ekiamin kurkazir igiabar aghuigh kamaghira iki. Egh Godin arazir aghuimin gin mangi an aven iki, mati gumazim korotiar ghurim sueghava korotiar aghuim aruzi an anevara. Egh ni Godin gavgavir ikiavira itim an suiragh an apengan iki, mati atrivim dapanir asuar aghuim isa uan dapanim garu. Guizbangira, God nin kurkazir aghuiba ko ganganir aghuim isi nguazir kamin gumamaziziba bar men akagham. Egh God ziar igiar mamning isi ni datighti aning iki kamaghira ikiam. Ziar kamning kamakin: "Arazir aghuim ni gamizi, ni navir amirizim ko dabirabir aghuimin iti," ko "Godin apengan itir arazim, a ziar ekiam ni ganidi." O Jerusalem ni dikavigh mighsiamin ghuamin pin tigh uan boribar gan. Godin Bar Zuezim, ghua aruem anadi naghin ko aruem ghuaghiri naghin, men diazi me uari akuvagha iti. Me

fo, God me ginighnigha men akura. Bizir kam bagha, me bar akonge. Nin apaniba fomira me inigha men akua uan suebar ghue. Eghti datirighin God ua men aku iziti me iziar ekiam iniam. Mati, gumaziba uan atriviba ateri moghin, izam. God akar gavgavim aniga ghaze, mighsiar ekiaba ko mighsiar doziba da bar magireghti, danganir iraghueziba uam izevegham. Nguazim bar voroghira irighiv ikiti, Israelia ua izi Ekiamin gavgavim ko angazangarim sara uan nguibamin izam. God mikimtima, temer mughuriar aghuiba zuiba otiv aghungti, Israelia dar orangtizimin apengan mangam. God Israelian faragh mangiti me tuavimin izi an gavgavim ko angazangarimin ganti, a tuavim men akagham. Eghti an guizin arazim ko apangkuvizir arazim ikiti me izi pamtem dimiva bar akuegham.

Kar Godin Akam.

SAM

Sam 126:1-6

Ia akam ikaragh: O Ekiam, e nin ingangarir ekiam bagha bar akonge.

Ikiavira Itir God uam e inigha Saionin nguibamin ize,
ezi dughiar kam e ghaze, e mati irebamin gari.
Kamaghin, e akava ighiabagh amuavira iti.
Ezi kantrin igharazibar gumaziba e migia ghaze,
"Ikiavira Itir God, Israelian akurvaghasa maburan ingangarimram ami."

Ia akam ikaragh: O Ekiam, e nin ingangarir ekiam bagha bar akonge.

Bar guizbangira, Ikiavira Itir God en akurvaghasa bar ingangarir ekiam gami,
kamaghin e datirighin naviba deragha bar akonge.

O Ikiavira Itir God,
Ni ua deraghvira e damuam.
E mati dipaba puvatizir danganimin itir faneba dipaba dake,
ni amozim damighti a ua iziti da ua izevegham.
Kamaghira, ni e damuti e izivagham.

Ia akam ikaragh: O Ekiam, e nin ingangarir ekiam bagha bar akonge.

Gumazir aravira dagheba opariba,
me dar dagheba iniva bar akuegh dimiva arangam.

Ia akam ikaragh: O Ekiam, e nin ingangarir ekiam bagha bar akonge.

Guizbangira, gumazir aravira dagher oviziba atera ghua da opariba,
me dar dagheba inigh uamategh ighiabara amu da ater izam.

Ia akam ikaragh: O Ekiam, e nin ingangarir ekiam bagha bar akonge.

2. RIT

Fl 1:4-6, 8-11

Akar dapanim: Krai gumamaziziba tuisighamin dughiam, ia bar zuegham.

**Akar kam, akinafarir Pol Filipain gumamaziziba baghava an osirizimin aven
iti.**

Dughiar faragha zuimin ghua iza
datirikin, ia nan akurvagha na ko akar
aghuimin ingangarim gami. Kamaghin
amizi, dughiar ki ia bagha God ko
migeiba, ki zurara bar akonge. Ezi ki
kamaghin fo, God uabi ingangarir kam
ia ganiga, egha ian navir averiabar aven
ingar mangi, Krai Iesus Ua Izamin
Dughiamin ingangarir kam a givagham.

God kamaghin fo, Krai Iesusin
apangkuvim uabi nan navim gamima ki
bar ian ganasa bar ifonge.

Ezi ki zurara kamaghin God ko
migia ghaze, arazir igharazir darazigh
ifongezim, a ian ikiva aghungiva

ekeveghiva mangvira iki. Eghti ia
fofuzir ekiam ikiva, egh ian nighniziba
bar dikirimigham. Ki ghaze, ia deravira
araziba bar dar gan da asavsuighiva
arazir aghuibar gin mangi. Eghti
Krai Ua Izamin Dughiamin, ia Godin
damazimin bar zuegh ikiti arazir
kuratam ian poroghan kogham.
Eghti arazir aghuir Krai Iesus amizir
otiviba, da bar ia gizivagham. Eghti
gumamaziziba dar ganiva ziar ekiam
God daningiva egh an ziam fam.
Kamaghin, ki ia bagha God ko migei.

Kar Godin Akam.

WELKAMIM GUTNIUS

Aleluia, Aleluia.

Ia Ekiam bagh tuaviba akir. Eghti nguazimin gumazamiziba God me bagha ingagarigha ua me inizir ingangarir kamin ganam.

Aleluia.

GUTNIUS

Lu 3:1-6

Akar dapanim: Nguazimin gumazamiziba bar moghira, God uam e inizir ingangarimin ganam.

Ia, Krais Iesusin Akar Aghuir Luk osirizim, a baragh.

Dughiar kam Taiberius Sisarín 15 plan azenimin Romin atrivimin itim oto. Ezi Pontius Pailat Judian Distrighin gavmanin gumazir dapanimin iti, Herot Galilin Distrighin gavmanin gumazir dapanimin iti. Ezi an aveghbuam Filip Iturian Distrigh ko Trakonitisin Distrighin gavmanin gumazir dapanimin ti, ezi Lisantias Abilenen Distrighin gavmanin gumazir dapanimin iti. Ezima Anas ko Kaiafas Godin ofa gamir gumazir dapanimningin iti. Dughiar kam Jon, Sekaraian otarim, gumaziba itir puvatizir danganimin itima, God uan migirigiam a ganingi. Ezi Jon Jordanin dipar miriamin aruava akam kura kamaghin migei, “Ia uan navibagh iraghiva rueghti, God ian arazir kuraba

gin amadagham.” Godin akam inigha izir gumazim Aisaian akinafarimin osirizir migirigiabar mirara ghu, a kamaghin migei,

“Gumazir tiarir mam gumaziba puvatizir danganimin dia ghaze, ‘Ia Ekiam baghiva tuaviba azeniva, dar kir.

Kukuniba apemiva, mighsiaba ko akiribar amuti da magiri.

Tuavir ighuagha aruiba dar amuti da voroghira iki.

Egh tuavir kurabar amuti da deragh.

Eghti nguazir kamin gumazamiziba bar
Godin akurvazimin ganam.’ ”

Kar, Krais Iesusin Akar Aghuim.

